

Paoro Pahcha Simiyame

Te'tesaronika

Iyoteparia

Teepotari

1 Kúíra Tesaronika tiopachi mochikame Riosichi poponiwaa, pipiniwa tiame. Ka'karuma mochikare eemea, teemea i'wao ka'karuma mochikamepua. Ka'karuma mochisaa eemea teemechitia, tísia kaawe enemiihua. Wee, i'wa aamo uhjurenane itapiti aamo no'o nayewiaio. Nee Paoroa, Siriwano ahjamao Timoteo tiameo, yooma wa'a Tesaronika tiopachi mochikameo, taamo Noonochi te'tereka mochitoameo, i'ka iyosi iyotesa aamo uhjurenania, yooma wa'a tiopachio, Eesusi Riosie Weratiamechi paparaka mochitoameo. Yooma wa'a Riosi tuuyewarichi te'teretoameo, aamo iikachio neea, ta'iria mochitojerania, amochiopua tiameo, taamo Noono tewekachi kahtameo, taamo Paamira Eesusi Riosie Weratiameopua tiameo, tísia ta'iria mochitojerania, aamo tísia ka'karuma neesetori, teewetokeka.



Copyright © Global Recordings Network. Used with permission.

*Siriwanoa Timoteo tiame, Paoro
chiia iyojura iyotena. (1:1)*

Tesaronika tiopachi mochikame, tísia Riosichi paparama

²Teemea aamowichioo, senepi taawechi Riosi ahjama nayewaio, tísia cheriwema ki'yamepua Riosio. ³Teemea Riosichi nayewiaio ki natakepame teemea, aamo tísia kaawe te'teretoaopua, Eesusi Riosie Weratiame tehkiwachio, aamo iikachio tísia kaawe

erakoamekapapua, tísia papamekapa eemea Eesusichio, tísia puuyetoka mochitoamekopua tiame, Eesusi tewekachi o'inia eenechi enamiaopua weechio. ⁴Aamo taamo Riosichi poponiwao, taamo pipiniwaopua tiameo, nane'rena teemea Riosio, tísia aamo nakiyamekopua, aamoo tísia apochi paparariopa. Nane'riame teemea aamoo wa'a te'teripopao, ahpo ijinuwa iintapariopua Riosio. ⁵Teemea aamoo, Riosi ka'karuma chiia aamo nayewiaio, te'ta pichiware Riosi chiia aamo nayewiamepua, Riosi Riosiwario tamochi yasitopa, puuua ki taamoe wa'api inatariaepua. Eemea amochi e'enarioiopua, nane'riame eemeapa aachin teeka taamo amochi kaawe te'tereka mochiriopua, kaawe teeremichiopua amochio.

⁶Kaawechupena eemea taamo Riosi kaaweruma tuuyewari chaachaparia, peenia erakoka ahjachi pichikerepua, tísia aiwaka mochitoaiopua, Riosie Weratiamechi paparapao. Puuu aamo aiwaka mochitooa, Eesusi aiwariaka tiame puuua i'wa weechi oiyai nayewatukao, teemeai wa'achitia aiwaka nokisiamepua, Riosie Weratiame nayewatuaio. Nape Riosia yooma amochi aiwatoachiopua, wa'achi ihtoame Riosiai amochi yasitooite ahpo Riosiwariame amochi yasitoko, yooma amochi pipiripichiopua. ⁷Eemea wa'a te'teretoaa aiwaka anachakao, yomachiami Riosichi paparakamea nane'rekamepua wa'asi, yooma Maseronia weechiami mochikame, Aakaya weechiami mochikame tiame. ⁸Eemea i'ka Riosie Weratiame naawesario, eeme wa'api amochi uuriaa, yomachi i'toriame eemeapa, Maseronia weechiamio, Aakaya weechiamiopua tiame. Eemea, ki wa'amisiche i'tokame eemea Riosi tuuyewario, ahkasi epeche waanamisi i'tokamepua pu'kao. Pukaepa teemea, ki nayewatumeri teemea wa'a aamo ohjoriachiopua, aamooopua wa'amioopua wa'asio, nayewaturioopua wa'asi. ⁹Puuua aamo ahpo mehkamisi i'yetoriopua i'ka Eesusi ka'karuma tuuyewario, aapoeo wa'api tísia kaawe erakoa aamo nayewamepua Tesaronika mochikameo. Puuu mehkami tuuyewari aamo i'yetoriaa, aamoo kaawe nayewamepua tiameo, taamo aamo Eesusichi simiyame i'yetoriao, tísia kaawe aamo noonowiriopa ahjachi tísia paparakao, tísia aamo Eesusichi paparapao, ahkasioi aamo itapiti ri'riosiwa ri'riosiereria ki ahjameo towariopa pu'kao, te'ta Riosi ahjamerachi paparamiapa, pu'kakamera yorakeka mochitonariapa, ki waapisi i'toka Riosi kaaweruma tuuyewario. ¹⁰Aapoeopua tiameo amochitiao, tísia puuyeka mochitoamepua Eesusi Riosie Weratiame eenechi enamerio, wa'a tiame tuuyetiamenia pukaao. Puuu eenechi enameria, apoe Eesusi puuua apoe Riosikamera Taanara i'wa weechi tijoetukame, Riosio pu'kao, mukukoi eenechi oijenateria, puuupua te'ta apoeo, taamo newipatiamea, Riosie tísia iinya tiame kokosariepuachio.

Paoro Tesaronika mochiwachi tekipanaria

2 Eeme wa'api no'o Riosichi poponiwa pipiniwa tiamea, nane'riamepapua taamo amochi tekipanariao, ki oowera kihtachi itipiriopua. ²Eemea nane'riamechi taamoo, Iiripo mochiwachi ajasirioiopua pehjo, tísia taamo na'aretiamekopua wa'ao, ke'chu aamo mochiwachi e'enoioopua. Nape teemea tísia wa'ineka na'aretiai Iiripo mochiwachio, Riosia taamo ku'ikamepua kihta seeweka amochi e'enamichioopua, wa'a Tesaronika mochiwachio. Wa'a aamo mochiwachio, tísia tehkikoi Eesusichi simiyame nayewatupuawichio pukeri taamo ajasirioio, kaawe nayewatukame teemea wa'ao, Riosie ku'ipatiapa wa'ao, oisa erapatekao. ³Teemea waikao oisa erakoka nayewatukamepua wa'ao, taamo Eesusichi simiyame nayewatuaao, te'ta pichiwari chaachapamekapapua. Teemea ki aaata wisikuiamekapaopua, te'ta Riosi pichiwari chiia pichiwaka masitekamepua aamoo. ⁴Ihji Riosi newipari tuuyewaria, Riosie e'retiame teemea amochi upamichioopua, amochi nayewamichioopua. Teemea i'ka taamo nayewatuaao, ki ti'tijoeri ahpo pu'seriakamera kaawe erakomichioopua, Riosi pu'seriakamera taamo erakomichioopua, Apoekopua taamo tewekachi kahtiame Noonoo, taamo inata tetewaka ne'niamea. Pukaepa puuuu nane'riamepua, taamo masitia ti'tjoerikamera pu'serewawichio enesoo, apoekamera pu'serewawichiooio. ⁵Teemea aaataoi ki peenia chaaneka u'yekamepua toomioi; ihtaai taamo ku'ipuawichiooi, kiamo itanekame teemea, Apoe Riosiai, nane'riamepua pu'kao, pichiwa no'o chiamekoo. ⁶Teemea amochio aaatachioio, ki taamokamera iyoripuawichio i'yakamepua, ⁷iinuekai teemea wa'a tiame taamo noonoimiao, Riosie Weratiamee ajawatiamekapa. Ohsotia teemea, kaawe e'reka aamo neesetokamepua, kukuchi yeeyerachitia ahpo tatana inatiamechitia. ⁸Teemea ki nu'uti aamo nakika mochitoamepua, Pukaepa teemea aamo mochikachi ohjoaio, ki i'ka Riosi kaaweruma tuuyewariche aamo kianarekamepua, epeche tiame aamo kianarekamepua pehjo, ahkasi aamowichio mukiwameoioopua, wa'a tiame nakiwewiame enesoo. ⁹Nane'riame eemea wa'a taamo mochikoio, i'ka Riosi kaaweruma tuuyewari aamo nayewiaio, te'ta utewaeme tekipanaka i'yariamekopua taamo ko'komiao, kihta peterenariapa teemea amochio.

¹⁰Teemea wa'a aamo mochikachi mochikaio, ka'karuma enekame teemea amochio, taamo te'ta piipakame ti'tjoechitia tetewitekaopua wa'a aamo mochikachio, kihta a'chi tiame taamo nayewapuawichioopua, aaataeoi. Pu'kao eemea aamoe wa'api tetewikamepua. ¹¹Nane'riame eemea tiameo, taamoo Riosichi tatanachitia aamo uuka tetewiriopua, aamo itapitiwichio

yuuwesirioiopua, kaawe e'raka aamo kaawe erapatesiriopa, aamooopua Riosichio, te'ta oisa erapatesika. ¹²Teemea aamoo tiameo, kaawe e'reka aamo tuuyekamepua, te'ta Riosi tatanarachitia aamo mochijerawao, Apoe Riosi wa'api aamo paajuteriopa, ahpo ahjama mochipuawichiopua, ahpo te'ta tísia peenia tiame ye'karichio.

¹³Eemea Riosi aamo paajuteria nakikamekapa, ahpo tísia peenia tiame mochiwarichi mochimeripua, Riosi te'ta ye'karichi. Riosio aamo ku'iriopa pahtekao taamo amochi nayewatuaao apochi eenamekoopua ki taamochi wa'api, cheriwema ki'yamepua Riosio, senepi taaweche. Pukaepa ihji Riosi kaaweruma tuuyewari pichiwa Riosichi eenamekapaopua, aamo iikachio yooma itapiti kaaweruma inisiamepua, yooma aamo pipiripichio, Eesusichi paparakamechio.

¹⁴Eeme Tesaronika mochikame Eesusichi paparamea, Uurea weeechi tiopachi mochikamechitia ikitiamepua. Puuu Uurea tiopachi mochikamea, ahpo wa'api weeechi mochikame i'isaerie, tísia aiwetetiame puuuu, wa'achitia eemeai aamo wa'api weeechi mochikameo, tísia aiwatetiamepua. ¹⁵Ihji ehpiami i'isaeri pa'pamuratuamea, Eesusi Riosie Weratiame me'yakamepua, te'ta ahpo ehkoriaami mochiriamechitia noonowiriachitia, Riosi na'nayewatura ko'yakamechitia. Ihji pa'pamiratuame Riosie Weratiame me'yakamea, kiisi kaawe e'retiamepua Riosieo, taamo wa'ineriamekopua pu'kao, ti'tiJoeri ki taamo nayewemichioopua Eesusichi simiyameo. Pukaepa, wa'a nokaka wa'inamekapao, ahkasi ahkai taamo muioipua Eesusichi simiyame nayewatumiao, taamo ma'chi uhjurakame puuuu, ki taamo nahkeka nayewatumichio ahpo mochiwachio. ¹⁶Puuu wa'a nokaka taamo wa'inarewaeo, kiisi taamo toakapua, i'isaeri ti'tiJoerichi taamo nayewetumichioopua, Riosie ahpo newipatepuawichioo. Wa'a nokakaopua ahpo, epeche epecheche tatakoriamepua. Pukaepa Riosia tísia nekakaopua pukachio, ki nu'uti kokosameripua pu'kao.

Paoro eenechi, Tesaronika tiopachi siminarewa

¹⁷Aamo taamo Riosichi poponiwao pipiniwaopua tiameo, neipami aamo mochikachi puuyasaapa teemea, aamo eenechi tetewinareka mochitokamepua, aamo ijinatopaka mochitoamekapa. ¹⁸Teemea weesa wa'a siimpanarekamepua aamo ne'nemiao, nape nee Paoro epeche, nape Satanasia senepi wa'a taamo siisimpanarioiopua, eepi taamo pejana weeweripakamepua, ki siimpapuawichioopua wa'ao. ¹⁹Ehpe taawechiamioi teemea tísia aamo tetewinareka mochitoamepua, eemekamerakopapua taamo te'ta peenia erakotiameo, ki aaata ki'tiamekopua wa'asi te'ta taamo kaawe eratemeripua. Eemea tiameo tísia taamo kaawe eratemeripua, Eesusi eenechi enasoioopua pu'ka ahjama mochikoio. ²⁰Eje'e amochio,

wa'a erakoame teemea, te'ta pichikekamekopapua, taamo aamo nayewaturiao, Eesusi Riosie Weratiamechi simiyameo.

3 Pukaepa wa'a tiichipa tísia aamo tetewinariapa teemea, tísia aamo nane'renariapa tiameo, achini aamo te'teretoapua Eesusichi aamo paparao, ki anachapakaopua wa'asio, Timoteo aamo uhjurekame teemea tapanaramio, teemea Aatena mochiwachi itipikapua waikao, pu'kao wa'a no'ramioio. ²Timoteo aamo uhjurekame teemea, pukachi aamo nane'renariapa aachin teetoamekopua aamoo, Eesusi Riosie Weratiamechi aamo paparao. Ihji Timoteoa, kaaweruma tijoe puuua, taamo ahjama tekipanakame Riosichio, Eesusichi simiyame tuuyewatukao. Timoteoo amochi uhjurekame teemea, aamo pewatiame mochitonureka ku'imichiopua Eesusichi aamo paparao, aamo oisa erapatemichiopua Riosichio, ³kiisi nahsinepaka, anachaka mochitomichiopua ihtaoi Riosiwichio aamo aiwaka mochitoaio. Eeme wa'apiiai nane'riamepua wa'a tiame aiwaniamekopua, Eesusichi paparameo. ⁴Aamo ahjama mochikaio, wa'a tiame aamo nayewakame teemea, aamo kokosa tiame aiwamiaopua, yooma teeme Eesusichi paparameo. Wa'a tiame taamo ikisipo tuuriaa, kiisi wehchi wichikamepua, pichiwa wa'a teetoniamepua amochio. ⁵Pu'kawichio aamo uhjurekamekai teemea Timoteoo, nane'renariapa neeea, achini aamo te'teretoapua, Eesusichi aamo paparao. Neeea ke'chu wa'a uhjurai Timoteoo, majawiameai neeea Satanasi, aamo sewina erapatepuameopua, aamo wa'a Tesaronika tiopachi mochikameo, Eesusichi paparameo. ⁶Nape ehpe wa'a no'rariopa Timoteoo, kaawe erapakame neeea, kaawe aamo te'tereto tuuyopa Eesusichio, kaawe aamo ahpo nakika mochito tuuopaopua tiameo. Aamoo tísia taamo ijinatepaka mochito tuuopao taamo tetewinarekao, wa'achi erakoame teemeai aamo tetewinariao. ⁷Teemea i'wao tísia aiwaio, tísia kaawe erapakamepua, wa'a aamo mochikachio tísia aiwaka mochitoaiopua, pewatiame aamo mochito tuuyetiapa Riosie Weratiamechio, ahjachi paparakao. ⁸Wa'a tiame inamukapa teemea aamochio, tísia oisa erapakame teemea, Riosi tehkiwarachi taamo mochitomio, eenechi oijenakamechitia. ⁹¿Teemea soparamena cheriwema kiamerina teemea Riosio, aamoo tísia kaawe yoratiamewichioo, tísia kaawe erakowa taamo eraterioopua tiameo, aamoo taamo nayewaturiachi paparakamekopao? ¹⁰Teemea Riosichi nayewaio, senepi itianiamepua pu'kao, taamo ku'imichiopua eenechi ahpo tetewimichioo, aamo toitia masitepuawichio pehjiio, aamo ahsepari nane'reka mochitomichiopua, Eesusichi simiyameo.

¹¹Pukaepa teemea, Apoe taamo Noono Riosio, Apoe Eesusi Paamiraopua tiameo, taamo ku'ijerania wa'a siimpaka aamo tetewipuawichioo. ¹²Apoe Paamirao aamo ku'ijerani teemea,

epeche aamo nakika mochtomichiopua ahpoo, aamo wa'achi te'teremichiopua wahjachioi, te'ta taamo aamo nakiyachitia. ¹³Neeea taamo Paamira Eesusio itaniamepua, aamo ku'ika Riosichi pewatiame mochtotemichiopua, kiisi se'wimichiopua aamo Riosichi paparao, no'oo aamo te'ta piipakame tetewitemichiopua no'o Noono tewekachio, no'o Noono te'ta katewiachi taawechio, no'o eenechi i'ka wehjoarichi tekinioiopa.

Aachin nokaka kaawe eratepuame Riosi

4 Ehpeo utewaeme aamo chaaniame teemea, Riosi kaawe eratewache aamo nokisimichio, te'ta taamo aamo masiteriachitia, nape utewaeme taamo te'ta Paamira Eesusi ijinuwarachitia.

²Machiyame eemeapa no'o aamo tuuyeriaio, aachin teeka aamo mochinuraria taamo Paamira Eesusichio, Apoe no'o weerakamechiopua, Apochi simiyame no'o nayewatumichiopua. ³Riosi nakiyaa ihjipua: Riosiche nakiya yooraka mochtopuame; kiisi suwepori nokipuame, ⁴yoomahka eeme nenewikameaio, yoomahka pipiripi ahpo yooreka mochtomeripua; kuunaraa ahpo uupi yooremeripua, uupiraa wa'achitia ahpo kuunachio, ⁵ki aaata ki Riosi machiyamechitia te'teretoka, ki aaataoi uupiraoui kuunaraoui ikotukeka. ⁶Aaataai eemea, ki wa'a nokaka mochtometepua, yooma i'ka wa'a tiame suwepori nokiwao, piiripioiopia wisikueniameo. Suwepori nokaka mochtotoameopua Riosia, ki teesa kokosamapua pu'kao. Yooma pu'kao, aamo tuuyekame neeepa, amochi masitiaio. ⁷Riosia ki iinya tiame taamo nokimichio taamo paajutekamepua, ohso kaawe Riosia, kaawerumarache taamo nokimichio apochi paaekamepua, ahpoche peenia e'ria nokisimichiopua. ⁸Wa'a tiiachipao aaata ki e'wiamea i'ka no'o chiiao, ki tijoekamera ki e'wiaitepua, Riosikamera ki e'wiai tiamepua, Apoekamera ahpo Riosiwari taamo ki'yaa, taamo neesetomichio kiatiamepua, ki itapiti suwepori tiamechi, taamo ruhjimichiopua.

⁹Neeea, ahpo nakika mochipuamechi simiyameo, kihta chanimetenia wa'asi pu'kao, apoe Riosi wa'api iintokamepua pu'kao, ahpo Riosiwari wa'api wa'a erapateka. ¹⁰Kaawe nane'reniamenia aamoo, Riosichi poponiwao pipiniwao tiameopua, Maseronia weechi mochikameo, taamo te'pa kahtiamene Noono nakiyachitia mochtotoamekopua, yooma aamo ahpo kaawe e'reka mochtotoamekopua. Nape teemea i'ka aamo nakika mochtotoniameo, epeche aamo epeche epechechi teetojeramepua. ¹¹Eemea kaawe aamo neesetoka mochtotopuapua, ki aaata aamo eina chaachapamichiopua aamo ku'ipuawichioo; ohso

kaawe, aamoe tekipanaka i'yapuapua aamo ko'komiao, te'ta aamo no'o tuuyeriachitiaopua aamo masitekao. ¹²Eemea wa'a te'tereka mochtometepua, ki Riosichi paparameo, kihta aamo chaanemichiopua. Aamoe wa'api i'yaka ku'yame enesaa, kihta tooremumeri eemea.

Eesusi Apoe Paamira eenechi enameri

¹³Ehpeo neeea, aamo Eesusichi paparame poponiwao pipiniwaopua tiame, aaata eeme mukisoo ihtana aamo ikimio nayewamane. Ma'chiamae aamo tuuyenarenia pukachi simiyameo, ki te'ta aamo yuuesimichiopua aaata Riosichi paparame mukukoio, kiisi eenechi ahpo tetewipuameko maaeka. Ihji no'o nayewamiana, mukukai eenechi ahjaniamepua, ki Riosichi paparamea ki pichikiamepua i'kao, wa'a te'tiapa puuuu i'kao, kihta inataka mochtioamepua, i'ka mukukai eenechi ahjaniamae. ¹⁴Teemea Apoe Eesusio pichiwa mukukai eenechi oijenario erakoapao, teemeai mukukaio, pichiwa eenechi taamo ahjamio erakoamepua. Wa'achitia Riosio, Eesusi oijenateriachitia, wa'achitia taamo oijenatemo erakoamepua, yooma taamo Eesusichi paparameopua.

¹⁵Wa'a tiiachiopua Eesusia, yooma taamo ahpo ijinuwao, apechunamia enasaapua, wahjipakame pahcha oijenatesa apechunameripua taamoo, yoomatiame ti'tijoe ooweru tiame apochi paparakameo. ¹⁶Pu'ka taawechei ikipuamea, tewekachi o'inia ki

ku'ita sisiname inamupuame Eesusia, te'ta Riosi ku'iwariai, ki ku'ita turuwachameri puuuai, ahpo turupuchaeo. Pu'ka turupucharie sisinamutioopua, tewekachi o'inia toomarichi weritoka, enameri tekika, Eesusi Riosie Weratiamea. Puuuu te'pa toomarichi werikao, yooma apochi paparaka wahjipakameo, wa'a o'inia apechunamapua pu'ka pahcha. ¹⁷Pu'ka yooma mo'moenapusaopua toomarichi ahpo weeriachio, taamopechi apochi apechunameripua waikao, yooma taamo Eesusichi paparameo, ahjaka mochtikameo. Kajusaapa taamo ahjakame weechei mochtikame apechunakao, ahpo oijenateria ahjama taamo enepatemeripua,



Riosi ku'iwariai ki ku'ita turuwani ahpo turupuchawao. (4:16)

pahcha ahpo apechunaria ahjama. Wa'a o'iniaio teemea, Eesusi ahjama mochipuachi i'topuamepua, wa'ao teemea, ahkasi ki wahjiamesi mochipuamepua. ¹⁸Wa'a ikipuamekopa taamoo, kaawe erakopuapua, aamo ahpo wa'achi teerenarewa erapateka, Riosi ye'karichi mochipuameo.

5 No'o Riosichi tetejima, te'ta taawechi Eesusi enamiachio, ka'chi iika iyotepuamepua achini keenakoo, aaataa kiisi nane'riamekopua pu'kao. ²Nane'riame eemeapa Eesusi enamioio, ichikoamechitia enamerikopua, tukaomi ahka senawato, wa'a tiame te'ta aamo masitekame teemea. ³Pu'ka taawechiamio ti'tijoerio, natakia ta'iria mochikoioipua, senawato enameripua, ti'tijoerio chaachapoiopua: “Ehpiamio kihta a'chi tiame naanewa tiamepua, yuuweeme po'yamepua i'wao.” Nape wa'a chaachapaka mochikoioipua, pukachio Riosi kokosaria senawato ahjachi enamiitepua, oowitiame saumerichitia senawato kokorepamechitia. ⁴Nape eeme ki tukapachi mochitoamea, pu'ka taawechi Eesusi enamiachio, ki senawato natakia mochikame chapipuamepua, ⁵eemea uutapachi mochitoamekapapua, Riosi uutaparichi ohjoamekapapua, ki tukapachi. Pukaepa ma'chiamie tetewika mochitoame eemea, itapiti ikiniameopua enamerikopua. ⁶Riosi taajenarichi mochitoamekapao teemea, ki kochika mochtometepua, ki natakia mochikame, tewimichio Eesusio, eenechi eenaiopua. ⁷Aaata Eesusi enamia natakia mochikamea, tukao natakia kokochiamekatepua, aaata nawajika mukipakamechitia. ⁸Nape teemea senawato enamiopa Eesusio, ki kochika mochitoamepua, taamo Eesusie apechunapuame puuyeka mochitoamekapa. Teemea tiameo, taamo Eesusichi paparae taamo neesetoamepua, weruma nakiwarieopua tiame, Eesusichi taamo iinuekaeopua. Teemea pukae paparario Eesusichi nakiraeopua tiameo, kajewakiraemeka te'teramepua muripao, soontaro nasiwamerika tiamechitia. Eesusi taamo newipatemia enamio inatatoka mochitoao, taamo nehpuhari kajemokorikachitia teetoame teemea tamochio. ⁹Wa'a te'teretoka taamo neesetoame teemea, Riosio taamoo, ki taamo kokosapuawichioipua ahpo kokosario, apochi iintapariopa, ohso kaawe taamo newipamichioipua, ahpo Taana Eesusichioipua, pukachi te'ta paparakapa. ¹⁰Apoe Eesusia, taamowichio mukukamepua, ahpo ahjama mochipuawichioipua, taamo apechunamia enasooopua wa'asi, taamoo ahjakame mochikameo, taamo wahjipariameoiopua wa'asi. ¹¹Wa'a tiiachipa eemea, utewaeme te'teretopuapua, kiisi nahsinepaka puuyekaopua, ahkasi Eesusi eenachisi anachaka. Ka'te kochika mochtomitia, ohso kaawe, aamo ku'ika oisa erapatepuapua, aamo utewaeme te'teretoachitiapa wa'asi.

Paoroe tuuyewa Riosichi te'tereniame

¹²No'o Riosichi tetejima, yooreka mochtomitia eemea, aaata Riosi tuuyewari masitario, aaata aamo ki kaawerumachi weritsoopua, aamo kakupachi iintapasiamopua, puuu aaataa aamoo, kaawe aamo neesetoka mochtoteriameopua, ki aamo tatakorihi ruhjimichipua. ¹³Eemea kaawe e'reka tetewipupua pu'kao, Riosi tehkiwachi yooramekopua aamowichioo, Riosichi aamo kaawe teeremichipua. Neeea aamoo amochio ta'iria aamo mochtoteramepua, kihta amochio nasiwaka.

¹⁴Aamo no'o Riosichi tetejimario, aamo terijerania aaata nanasinameo, ki i'yaka mochtioame, itapiti ahpo ta'pechi nakiwiao. Aaata ki Riosie ahpo nakiwameko e'raka yuuwesiamoo, kaawe erapatepuapua pu'kao, Riosieo, tísia nakiniameko tiio, tuuyeka. Aaata ki te'ta utewaeme tiameopua Eesusichi ahpo paparao, kaawe e'reka ku'ipupua pu'kao, kihta nahsinapa aamo pu'ka ku'imiao, oisa erapaka utewapamichipua Eesusichi ahpo paparao.

¹⁵Kaawe aamo neesetopupua, aaata aamo na'araka ki kaawe iintoso, ki wa'achitia na'ara yooraka natetepupua. Ohso kaawe kaaweruma nayewaka katewepupua pu'ka ahjamao. Wa'a te'teremete eemea amochio, Riosichi paparaka mochtioamea, aaatchioipua, ki Riosichi paparamechioi.

¹⁶Eeme Eesusichi paparamea, ka'te yuuwesika mochtomitia, ohso kaawe kaawe erakoka mochtopupua aamo iikachio. ¹⁷Ihta itapiti ki kaawe ikiwame aamo teetosopua aamo pipiripichio, Riosi itapupua aamo ku'ipuwichioo, a'chitia keenakooi ki kaawe ikiyaio. ¹⁸Ihta a'chi tiame ikiwachioi, cheriwema kiapupua Riosio, kaaweruma ikiyaio ki kaaweruma ikiyaio. Itapiti ki kaaweruma aamo ikiwame enesaa, cheriwema kiapupua aamo tewekachi kahtiamoo Noonoo, aamo chokichi kahtiamekopua pu'kao, aamo ku'ipuwichioo. Wa'a tiame aamo te'teretojerame Riosia, yooma ahpo Taana Weerariamechi paparaka mochtioameo.

¹⁹Ka'te choipamitia eemea Riosi aamo tuuyenariao, ihtaaoi aamo tuuyenariao, ahpo Riosiarieo. ²⁰Ka'te ke'chu aamo kaawe ne'niai Riosi tuuyewari iyotetiameo, ipaka tetewimitiapua, aaataoi Riosie eratetiame masitiame tuuyoio. ²¹Yooma aamo masiteka tuuyao, kaawe wa'achitaka ne'nesa Riosi Iyoterichi chiao, kaawerumarache uusa amochi teetopupua. ²²Yooma aaata se'wi masitiame enesoo, poanatuapupua pukachio.

²³Neeea Riosio, aamo te'ta cheriweka piipatekameo, wa'api te'tiame piipatetiame aamo te'teretojerania Riosio, ahkasi Riosie Weratiame eenachisopua, kihta ki kaaweruma aamo te'teretomichipua aamo iikachio, yomatiamoo weerewachioi,

yomatiaame aamo inatarichiopua tiame. ²⁴Neeea Riosio, yooma aamowichio no'o itaneriaio, yoorakache itipiamekopua pu'kao, tísia ikikache itipimeriko e'ramenia pu'kao, pu'kawichio aamoo, ahpo tatana iintapakamekopua pu'kao, pu'kawichio aamo apochi paaekamepua.

Kajuyachi teepotari

²⁵I'wasi ihji no'o aamowichio iyotiaa. Taamochowichio itajeraninia Riosichio, taamo kaawe teetomichiopua Riosichio.

²⁶Teepotemitiachepua wa'ao, yooma taamo Riosichi tetejimaio, kaaweruma aamo e'rewakaopua.

²⁷Neeea Riosie Weratiamee weratiamea, tísia aamo iyonajeraninia i'ka aamowichio iyoteriaio, yooma wa'ao, wa'a Tesaronika tiopachi mochikameo, yooma wa'a mochikame Riosichi tetejimaio, poponiwao pipiniwaopua tiameo.

²⁸Apoe taamo Paamira Riosie Weratiameo, yooma ihta Riosi kaawerumario, amochi yachajeraninia. Wa'a no'o aamo e'ria ikisaa, tísia kaawe enema Riosia.

Cheriwema, kajurunia wa'asi.